



GEorgius, patria Chemnicensis, natus est honestis parentibus in festo S. Georgij, qui erat 24 Aprilis, anno 1516. Is cum felici ingenio esset praeditus, à pueris operam literis dedit, & in patria artium & linguarum fundamenta feliciter iecit. Inde sese ad Lypsensem Academiam contulit, & magna diligentia Philosophiæ, & in primis arti Poëcæ incubuit. In ijs quoque adeò profecit, ut postea inter doctos magnū sibi nomen compararit. Cum hoc modo egregiè perrexisset, Italiam inuisere statuit, atque Romam ueniens uetusta monumenta inspexit Quoniam etiam uiri doctissimi passim in Italicis Academijs bonas literas profiterentur, ipsos

audiuit, & eruditionem suam plurimum auxit. In patriam reuersus, tandem celebrem Argentinensium scholam accessit, & præceptore Ioanne Sturmio usus, eloquentiæ studium percurrit.